

**Zeitschrift:** Annalas da la Societad Retorumantscha

**Herausgeber:** Societad Retorumantscha

**Band:** 67 (1953)

**Nachruf:** Dr. Andreia Grisch : anterious capo digl institut da controlla da semenzas ad Oerlikon/Turitg

**Autor:** Plaz, Bonifaci

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 22.08.2025

**ETH-Bibliothek Zürich, E-Periodica, <https://www.e-periodica.ch>**

---

---

# Dr. Andreia Grisch †

*Anterior capo digl institut da controlla da semenzas  
ad Oerlikon/Turitg*

*Bonifaci Plaz*

Igls 6 favrer 1952 è spartia an sia tgesetta a Küsnacht/Turitg dr. Andreia Grisch, igl anterior capo dalla controlla da semenzas digl institut federal experimentativ ad Oerlikon/Turitg. Ena greva malsogna ò tarro igl ferm Sursetter an la vigliadetna da 74 onns. Cun el è spartia en zont meritevel erudit botanist e grond promotour dalla planticultura svizzera.

Andreia Grisch, cugl vischinadi da Sour, è naschia igls 5 da schaner 1879, scu fegl da Bortel Grisch e Mena Spinas da Tinizong, a Surley sper Silvaplana, noua tgi sies bab era viér cantunal. Pi tard ò la famiglia Grisch sa ratratg a Tinizong. Co passainta igl gioven mattatsch igls onns da scola primara. Scu bagn blers oters mattatschs grischungs ò er Andreia Grisch betg savia galdeir igls seis meis tranter la scola scu vacanzas, mabagn stuia occupar chel taimp cun lavourettas da pour a tgesa, sen las aclas, sen l'alp, seigl scu vaschander, scu paster u sezzen etc. Cun cant plascheir tg'igl barmeir chintava da sia veta idillica sell' Alp Tscharnoz u digl sies paschantar la biestga sen las aclas da Senslas, ò igl autour da chestas lengias santia sez or da sia atgna bucca. E cun tge daletg risdava el, scu el an sias belas ouras da pôs, vegia intaglea ainten ena tarmenta plantatscha a Senslas las inizialas digl sies nom e signia ainten chella igl cunfegn territorial tranter Tinizong e Savognin scu term vivent, essend tg'igl term-crap cun sias stamongias n'era strousch visibel ple. Ansomma, en mattatsch grischung an vischnanca purila sto veir tgiro, schiglio na vignogl or dad el betg en om da vaglia. Las impressiungs acceptadas digl pitschen Andreia durant la stad an gôts, sen pastgiras e prôs ed alps da sia patria, la

grondiosa flora alpina agl pè dalla Pizza grossa ed an Val d'Err èn franc stadas decisivas per sia futura clamada. Siva veir absolia la scola primara, frequenta igl intelligent e vidut Andreia igl seminari scolastic a Coira e fò 1899 la patenta scu scolast. Igl gioven scolast, plagn brama per la scienza, sadecida da stibgier anavant e concluda sies studis agl Politecnicum ed all' Universitad a Turitg cun la promoziung da dr. phil. Sia labour doctorala è deditgeida agl territori da sia patria intima e sacloma: «Beiträge zur Kenntnis der pflanzengeographischen Verhältnisse der Bergünerstöcke».

### *1. Igl erudit botanist*

Siva conclusiung da sies studis alla partiziung agrara digl Politecnicum cattainsa dr. Grisch en taimp scu assistent tar igl cunaschaint prof. Schröter. Sessour aintra el sen racumondaziung da Schröter an la staziung da controlla da semenzas fundada da dr. F. G. Stebler ed el è rasto fidevel a sia piazza ed a sies pensum surpiglia cun veira perseveranza digl muntagnard. Grisch ò acquisto durant igls sies onns da studis e d'assistenza, durant igls cals el è rivo an intim contact cun omens dalla scienza naturala da divers roms ed er cun medics, en solid fundamaint scientific per sia clamada. En straintg pensum da mintgade igl ò mano ainten la pratica dalla labour da controlla. Sies agens perseverants studis e chel fitg bung fundamaint igl on prasto bungs sarvetschs tar l'eleboraziung dallas metodas per l'analisa da puritad, per l'examinaziung dalla forza scherminanta e tar la determinaziung dalla derivanza dallas semenzas. Sies pensum quotidang, gl'amprem sot a dr. Stebler e dr. Volkart — sies chinò — pi tard scu capo independent dalla partiziung, sia ferma voluntad igl on furnia ena immensa experientscha ed ena gronda survista digl antier territori da sies rom professiunal. Igl funso e sieir pareri ainten la determinaziung da derivanza digls sems igl ò purto renom internaziunal scu specialist da vaglia. Igls sies collegas digl exteriour, cugls cals el ò catto contact persunal sen congress internaziunals, apprezievan fitg sia labour fundamentala. Numerousamaintg nivan provas da sem tamessas digl ester agl institut svizzer ad Oerlikon per lascher determinar e contollar e chegl sems tgi bagnsavens purschivan las pi grondas difficultads d'analisar. Cotras era ins ad Oerlikon er segl

corrent ed oriento sur d'impurtants evenimaints ainten igl commers internaziunal ed ins era uscheia ainten la pussebladad dad esser precaut tar tschertas derivanzas da semenzas da trefigl e dad ervas, las calas n'eran betg favorevlas ni betg cuntantevlas per nossas relaziungs svizzras. Dasper l'immensa labour miniziosa an luvratori ed an pareris ò dr. Grisch anc catto taimp per tractats da sies rom. An gronda e manedla labour, funsada sen ena enorma experientscha, ò el savia publitgier sia labour: «Die Herkunftsbestimmung der Klee- und Grassamen», ena publicaziung ed ovra fundamentala per specialists da controlla da semenzas. Tiers chellas labours scientificas ò dr. Andreia Grisch anc sarvia alla scola agricola scu autour da divers fitg bungs codeschs da botanica e da planticultura. Sies codesch elaburo cun dr. Bandi «Pflanzenkunde und Pflanzenkrankheiten» ò gia anfignen oz ple tgi ena mesa tozza ediziungs. Scu cuntuaziung dalla controlla da semenzas ò gio bôt igl institut turitges prasto labour da pionier sen tarragn da cultura da pavel. Dr. Grisch è, sco pi bôt dr. Stebler, carschia veadaint an chest vast pensum. Nous vagn d'angratzger ad el bagn bleras provas fatgas sen chel tarragn e chegl betg angal giu alla bassa, mabagn er sen territori da muntogna e pastezs an sia atgna vallada da Sursés (Tinizong, Flex etc.). Sies special interess era chel da stibgier las pastgiras d'alp e da colms da nossas vals grischungas. Scu fegl dallas munto-gnas cunascheva Grisch las grondas difficultads, tg'igl migliuramaint da pros e pastgiras purschivan ainten la regiung alpina, ma el ò tuttegna cun gronda cunaschentscha ampruvo da las migliurar tant scu pussebel cun pled ed ovra. Chella dumonda tractescha el ainten sia scritgira «Zur Frage der Erhaltung und Verbesserung des Pflanzenbestandes subalpiner und alpiner Wiesen und Weiden». Sies codesch «Die hauptsächlichsten Pflanzen und Pflanzenbestände der Naturwiesen und Weiden» porscha sia gronda experientscha ed observaziungs an cultura da pavel natural schianavant scu el è avantagious per igl pour. Antras sia gronda collecziung da fotografias èn bagn bleras exposiziungs agricolas nidas anritgeidas e bagn bleras orneschan igls salvs an scolas purilas e dasper chellas cattainsa bagn savens er diversas interessantas tabellas e statisticas compiladas da dr. Grisch (per ex. Plantahof). La cummischung da cultura da plantas dall' Uniung purila svizzra e dall' Uniung cantonalta turitgesa, allas calas el è sto durant blers onns en fidevel

commember, òn adegna pudia chintar an tottas dumondas tecnicas sen sustign e collaburaziung da Grisch.

Dr. Grisch ò adamplia tottas obligaziungs, tgi sies uffeci purtava, cun totta premura. Tar el davogl nigna mesa labour, tot niva fatg concenziousamaintg e schi stueva esser er siva surasontga. Uscheia ò el causa da blera e savens urgenta labour stuia tralascher d'elaborar divers problems, tg'igl stavan a cor. Parchegl catavans el siva sia activitat ufficiala da passa 40 onns occupo cun projects, pigls cals el na veva pi bôt gia nign taimp. Deplorablamaintg ò la mort laschea crudar la plema mengia bôt or da mang ed uscheia èn diversas labours planisadas betg ple secretgas alla fegn.

## *2. Igl istoriograf local.*

Dr. Andreia Grisch n'ò betg angal s'interesso per sias plantas, flours e semenzas sen sies sulom grischung e svizzer. Ma forsa ò gist la cunaschentscha da tottas ervas digl sies paeis sviglia ainten el igl regl e plascheir per igl passo, per las tgossas istoricas da sia patria. An tot cass ò el cun gronda premura e carezza az deditgia all' istorgia locala da sia val. Gio an giovens onns ò igl barmeir visito e perscruto igls archivs comunals e parochials da Sursés e rimno en vast material istoric da nossa val, igl cal el ò elaburo tar ena stupenta labour: «En curt viadi tras Sursés e sia istoria». An mancanza d'en organ an lungatg surmiran è chella labour cumpareida gl'amprem 1910 ainten igl «Pelegrin» an lungatg sursilvan. Sen giaveisch da blers è chella istorgia da Sursés alloura nida publitgida an rumantsch surmiran ainten las «Annalas» XXX (1915). Igl interess per chella labour è sto fitg grond, uscheia tgi igl autour ò laschea far separats da sia labour per las scolas da Sursés e chegl sen agen costs. Tenor noss saveir è chegl sto l'amprema ediziung pi gronda — excepziuno igls codeschs da scola — stampada tenor las reglas da Candreia an lungatg sursetter. La labour da dr. Grisch è anc oz la pi gronda labour istorica da nossa val an rumantsch e tudestg. E chella istorgia è elaborada sen fundamaint dallas miglras funtangas istoricas e cuntigna igls pi novs resultats existents da lez taimp. L'antiera labour è cungeida trasatras cun las pi belas detgas anc existentes da noss paeis e noua tg'igl spazzi mantgeva, èn chellas inditgeidas antras remarcas, noua tg'ellas èn da cattar.

Tottas detgas rimnadas ainten igl tom X dalla Chrestomathia da dr. Decurtins èn ventiladas. E bagn savens sainta ins a vibrar la folcloristica da Sursés tranter las lengias. En' otra labour istorica «Sur dallas ferrareias an Sursés» è cumpareida ainten igl «Ischi». Cura tgi Surmeir ò 1922 obtignia — betg sainza la gronda premura da dr. Grisch — igl sies organ annual, igl «Sulom», cattainsa gio ainten l'amprema annada ena bela labour da Grisch sur digl vigl «Ospici sen Set». Ansomma ò Andreia Grisch, scu er sies frar Giatgen, tgi nous lessan numnar an chel connex, adegna demusso grond plascheir ed interess per l'istorgia da sia patria intima ed igl scribent da chestas lengias ò ratschet bagn encal detagl or da sia bucca, or da sies vast satg da retgezzas digl passo.

### *3. Igl patriot rumantsch*

Dasper sia premura per la gronda labour da professiung, dasper igl interess per l'istorgia locala da sia val paterna, stava a cor a dr. Grisch scu nign' otra tgossa igl sies lungatg matern, igl Rumantsch-Surmeir. Igli chito per igl mantignamaint da chel igli ò laschea davantar egn digls pi fervents pioniers per uniformar l'ortografia da noss lungatg da Sursés. Dr. Grisch è sto, dasper insp. Tona Sonder, presid. Andreia Steier e presid. Otto Spinas, egn digls amprems pretendents per realisar, tgi noss idiom surmiran vigna rancunaschia scu lungatg ufficial da scritgira. Siva la fundaziung dalla Leia Rumanscha 1919 è Andreia Grisch sto alla tgigna dall'Uniung Rumantscha da Surmeir ansemen cun igls gist numnos e chels fundatours òn er stgaffia igl organ periodic, igl organ litterari per igl rumantsch surmiran, igl «Noss Sulom». Grisch n'è betg sto ainten l'organizazion administrativa dall'URS, causa da sia dimora a Turitg, ma tant daple è el sto egn digls pi attatgeas e fidevels commembers da chella, scu bung cunsiglieder e depoto da chella tar seduttas u radunanzas. Gio an onns da student rancuntrainsa Grisch an collaboraziung cun J. Huonder cun ena labour rumantscha ainten igl «Ischi IV» sur digls «Noms da fretgs e verduras». Cun tge plascheir ligiainsa nous lò noms rumantschs, tgi èn oz per part strousch ple cunaschaints scu: parmogler, culeischen, surer, rimiger, barscholer (tgaglia morta), tschisdet, soura, schuanga, cagliungs-tgang etc.

Ainten igl volum X dalla Chrestomathia figurescha ena labour pi gronda digl gioven Grisch sur dalla «Val Sursés e sia vegetaziung». Chella skizza, scu el la nomna, è egna dallas pi detagledas descripziungs geologica e floristica da nossa val an lungatg rumantsch. Cun tge admirabla suveranitad dascreiva el co la compo-



siziung petrografica da nossas muntognas, ma tgapibel, el veva gio accumpagnea Emil Ott, igl autour dalla geologia da noss territori ed uscheia gudagnea ena buna invista an chel rom. E cun tge plascheir dascreiva el la vegetaziung da sies bel Sursés, po ins liger or dall' amprema constrúcziung: «En anc pi pussant e variont maletg tgi la constituziung geologica e topografica da Sursés, porscha la sia flora.» Cun veira cunaschentscha dalla matergia dascreiva el la furmaziung coniferina da Sursés: igl pegn, igl tiev, igl aniev, igl

laresch ed igl sember, las seis plantas da guglia da noss gôts e sessour fò el ena detagleda descripziung dallas bostgeras cun zun-drignom, tgagliom (cun ogneras, nitscholeras e drossa), arbus-tgom (cun la saletscha e gioppa) da nossa val. An terza lengia suonda la descripziung digls ervadis cun las carschentschas digl tschispet grass da tgesa, aclas e mogns e digl tschispet maier (maierts, pastgiras e colms). Gio bôt antupainsa Grisch scu com-member e collaburatour dalla SRR. Nous vagn gio menziuno sia labour istorica «En curt viadi tras Sursés e sia istoria» cumpareida ainten las Annalas 1915. Chegl è egna dallas pi voluminousas la-vours rumantschas da sia plema. Schi nous cattagn siva da chella labour pi pacs tractats rumantschs, schi stuainsa saveir, tgi igl pen-sum da sia clamada dumandava tot sia forza e tot igl taimp disponibel. Da chel taimp veva el gio fundo sia famiglia, alla cala el è sto en fidevel ed exemplaric consort e bab. A Turitg veva dr. Grisch fatg cunaschentscha cun la giovna Ida Volkart, la sora da prof. dr. Albert Volkart ETH († 3. 8. 1951), cun la cala el ò antro an lètg. Sia zont premurada e scolada consorta igl ò regalo dus feglias: Mena ed Elisabet, tgi furmavan igl plascheir digls genitours. Schibagn tgi chellas dus feglias òn absolvia la scola tudestga a Turitg, èn ellas nidas introduceidas ainten igl lungatg patern. La simpatia ed igl interess digl bab per igl lungatg rumantsch ò el er samno bôt ainten igls cors dallas frestgas mattas ed igl è betg ena casualidad, tgi Mena Grisch ò fatg igl doctorat filologic gist sur digl lungatg sur-miran cun la valenta dissertaziung: «Die Mundart von Surmeir» e tgi chella ò pi tard ansemen cun ser archivar Giatgen Battaglia compilo las «Normas ortograficas da Surmeir». La sora giovna è davantada ena scolasta da vaglia. A Turitg era dr. Grisch en fervent commember dall' Uniung Rumantscha da Turitg. Siva la naschen-tscha dall' URS, tar la cala èl è sto padregn ch. v. d. fundatour, è el sto a chella fidevel anfignen sia mort. Gea, gio l'amprema annada digl «Noss Sulom» porta ena labour da sia plema sur digl «Ospici da Set». Ainten l'annada III ò el publitgia ena detagleda terminologia rumantscha per l'electricitat — tgi era dacurt instal-lada an Sursés — ena labour fatga an veira furma populara. Deplo-rablamaintg òn gist chels noms tecnics dall' electricitat tar nous scu utro betg tgappo immediat reisch ainten igl pievel e nous vagn anc oz bleras expressiungs tudestgas. La colpa è nossa.

Ainten las «Annalas» 42 e 52 ò dr. Grisch publitgia las noblas biografias digls dus valents poets rumantschs da Sursés, da pres. Rudolf Lanz da Beiva e da pres. Andreia Steier da Riom. Parchegl deschigl er da purtar igls marets da dr. Andreia Grisch scu segn d'angraztgamaint per sia labour ainten chestas Annalas.

L'attaschededad a sia patria rumantscha, a sies tger Sursés, ò Grisch documento onn per onn. Schispert tgi sias vacanzas scumanzavan, era el a Tinizong cun tot la sia famiglia. Co veva el occasiung da puspe respirar aria alpina, d'admirar sias flours ed ervas, da discuttar cun puraglia da muntogna igls problems d'agricultura, da ruschanar sies lungatg-mamma e da cattar sies bungs ameis. Gea, tals veva el bagn blers. Rivava el a Savognin, cattava el co sies amei pres. Tura Peterelli, mort ca. en onn avant Grisch, cugl cal el pudeva discussiunar bagn bleras tgossas ed evenimaints da totta nateira dalla val. E durant sies taimp da vacanzas davogl bagn bleras dumengias, noua tgi el sacattava cun sies intim cumarat Andreia Steier. Cantas gedas òn chels comunablamaintg battia la veia Tinizong—Savognin—Cunter e vicerversa batarlond da problems linguistics e da tgossas istoricas, sainza sacorscher tgi las ouras passavan. Sen chellas spassagedas èn bagn diversas novas ideias nidas discuttadas e divers problems tgi stavan a cor madiros tar realtad, tgi nous na savagn betg. Ed an Surgôt sacattava dr. Grisch a Sour, agl li da vischinadi, u sen Flex cun sies amei scol. Christoffel Cotti, igl cal saveva er risdar bagn bler interessant sen tarragn istoric ni folcloristic digl noss paeis.

Avant betg schi blers onns ò igl barmeir erigia sen Castelas (Tinizong) sia bela tgesetta da vacanzas, noua tgi el passantava sies taimp da pôs anmez sies carezzo pievel rumantsch, anmez ena prada e contrada, la pi interessanta per en erudit dalla botanica. Cura tgi nous vagn gia l'onour d'esser hosp an sia tgamonna — schi nous la dastgagn numnar uscheia — vainsa pudia udeir bagn bler giu da sia bucca an en bel lungatg net e stget, igl cal el dominaiva cun eloquenza d'oratour. Cun tge exactezza detagleda saveva el risdar d'evenimaints da sia veta, ni da fatgs istorics dalla Val d'Err ni dalla Val Sursès u magara da sias ervas e flours. Cun bucca rienta rachintava el gugent, scu el an giovens onns, vegia catto ainten igl vallung da Val lunga ena rara flour, scu el è munto vers igl Piz Val lunga per cattar l'otra flour dalla cala igl sem era

sgulo noagiu ed el vegia er la cattada. Ainten igl descender a val seia el bristgia or sen la neiv deira e rudlo en detg toc veagiu pardond sies fist da culeischen e sia beschla da botanica per mai la cat-tar ple. Alloura rachintava el da sies turs, tg'el fascheva pi bôt per augmentar sias cunaschentschas dad ervas etc., rivond bagn encal-geda a tgesa da notg. Meinsgard pertava el an fegna satira encal episoda da vigls originals da Sursés cun lour detgas sitgas e fe-gnas snasadas an en fegn, ma genuign lungatg rumantsch.

Schi dr. Grisch n'ò er betg sa participo directamaing ve dalla politica, suandava el tuttegna igls evenimaints digl taimp cun ïgl avert e schi fascheva basigns, na tirginava el betg cun sies agen ed independent pareri, e gist an tgossas tgi tangevan sia patria saveva el defender ena buna tgossa cun veira pedanteria, ma er crititgier gl'egn u gl'oter cun bungs argumaints sainza far gotter. Uscheia ò el er piglia veiva art e part digls sies cumpatriots sursetters igl mu-ment tgi Rona vess gia da davantar en lai artificial per forza elec-trica (ca. 1912) e gist co samossa sia amour-patria, sies bung visi-maint, sia carezza per sies concarstgangs. An sia gio ventilada la-vour «En curt viadi tras Sursés» dei el igl sequent: «Possa esser spargnea alla nossa val per adegna ena sagonda sumigliainta cata-strofa, prinzipalmaintg er per cass, tgi vess da reuscheir agl modern capitalismus da transfurmar, angal muord cueida dad otas divi-dendas, las paleis de Rona an en lai artifizial, sainza stueir prestar oravant suffiziainta garanzeia reala u personala per tots donns, tgi vessan bôt u tard mai da neir caschunos an consequenza da chella interpresa ... Mintga loial carstgang, tgi è er angal mez an-cunaschaint cun igl terragn dellas ‚Bovas‘, della Tscheppa e de Tscharnoz vign a rancanoscher alla part inferioura da Sursés igl dretg, la nezessitat, gea sez l'obligaziung da pratender palpabla garanzeia per cass d'eventualas catastrofas, avant tgi stueir lascher metter an privel e cotras sbassar la valetta digls sies bagns scha-schants, angal an favour d'aczionaris esters. Cattan las nossas auto-ritads cantonalas, tg'igl interess general pratenda propa da metter tanta prada cultivada sot ava, faschond nescher per otra inviabel privel, schi egl francamaintg navot oter tgi dretg e gist, tg'igl gene-ral, an favour digl cal igl singul ò da lascher metter an privel sies agen, daclera oravant da surpiglier solidaricamaintg totta respon-sabilitad per igls donns, tgi savessan neir caschunos an consequenza

della numnada interpresa. Cotras niss impidia, aglmanc per part, igl sbassamaint della valour reala, d'ena massa d'fons e d'en grond domber bietgs ed an madem taimp er procure e siero, tgi las nossas generaziungs successouras na vegian betg forsa dad esser dependentas en bel de d'almosnas e della caritad publica . . . Sursetters, tgi painsan da Sursetters, ston tenor mia persvasiung, pratender chegl categoricamaintg e betg lascher metter en sulet crap atravers per fermar en schi immens sgulatsch d'ava an mez Sursés, avant tgi na seia betg presto duevla e veira garanzeia per tots donns, tgi sa-vessan nescher an consequenza da tala interpresa.»

Cun dr. Andreia Grisch è en serious om dalla garda viglia, en mester da sies mastier, svania or da noss mez, en om cun cor e mang avert per sies concarstgangs, tgi ò mess durant sia antiera veta tot sia yasta saveida e sia forza an disposiziung dall' agricultura, an sarvetsch da sia patria, dall' istoria e cultura da chella, scu er an sarvetsch da sies carezzo lungatg rumantsch. Sia memorgia vign a rastar a nous semperveda scu igl sember statevel e sies exaimpel duess esser noss mossaveia.

*Publicaziungs da dr. Andreia Grisch:*

*Rumantschas:*

1. Noms da plantas e verduras, an collaburaziung cun J. Huonder, Ischi IV.
2. In cuort viadi tras Sursés e sia istoria, Pelegrin X ed XI.
3. La val Sursés e sia vegetaziung, tom X. Chrestomathia Retorrumantscha.
4. Ord l'istoria dellas minas da fer e mangan de Tinizong, Ischi XV.
5. En curt viadi tras Sursés e sia istoria, separat, Annalas XXX., 1915.
6. L'augmentaziun della producziun de vivondas en nossas valladas alpestras ed alpinas. (Notizias publicadas per sclariment ed instrucziun dil pievel romontsch ed edidas sin incombenza della Societat alpestra svizzra e dil Departement svizzer della economia publica 1918).
7. Igl ospici da Set, Sulom I. 1922.

8. L'electricitad, Sulom III. 1924.
9. Pres. Rud. Lanz, biografia, Annalas XLII.
10. Pres. Andreia Steier, biografia, Annalas LII.
11. Pang-cucu, bulias e barba d'pegn, Igl uaul — igl god grischun 1932.

*Tudestgas:*

1. Beiträge zur Kenntnis der pflanzengeographischen Verhältnisse der Bergünerstöcke. Beihefte zum Botan. Zentralblatt, Bd. XXII.
2. Die hauptsächlichsten Pflanzen und Pflanzenbestände der Naturwiesen und Weiden. Herausgegeben von der Pflanzenbaukommission der Landwirtschaftlichen Gesellschaft des Kantons St. Gallen (Sonderdruck aus dem St. Galler Bauer). Flawil 1931.
3. Die Herkunftsbestimmung der Klee- und Grassamen. Mitteilungen der Internationalen Vereinigung für Samenkontrolle, Bd. 13.
4. Zur Frage der Erhaltung und Verbesserung des Pflanzenbestandes subalpiner und alpiner Wiesen und Weiden.
5. Der Anbau der Feldfrüchte und Futterpflanzen. Herausgegeben vom Verbande der Lehrer an den landwirtschaftl. Schulen der Schweiz. Mit A. Näf. Verlag Wirz & Co., Aarau.
6. Pflanzenkunde und Pflanzenkrankheiten. Mit Dr. W. Bandi. Landwirtschaftl. Lehrbücher. Huber, Frauenfeld.

*Necrologs per dr. Grisch:*

Fögl Ladin. Nr. 15, 1952.

Der Zürcher Bauer. Nr. 12, 1952.

Schweiz. Landw. Monatshefte. Verlag Benteli A. G., Bern/Bümpliz, Nr. 2, 1952.

Calender Surmiran, 1953.